

Penoreh getah juara Pertandingan Moh Tangkap Baung Merah

Oleh ROSILAWATI ROSEDI 03 Jun 2024 04:46pm Masa membaca: 4 minit



Abdul Jalil (Merah) menerima replika cek juara bernilai RM2,000 yang disampaikan Menteri Besar, Datuk Seri Wan Rosdy Wan Ismail (tiga dari kiri).

LIPIS - Penoreh getah muncul juara Pertandingan Moh Tangkap Baung Merah Daerah Lipis selepas berjaya menaikkan ikan baung merah seberat 20.6 kilogram di Sungai Jelai pada Jumaat sekali gus meraih hadiah wang tunai RM2,000.

Abdul Jalil Mohmad, 55, dari Kampung Kuala Serau dekat Kuala Medang di sini memberitahu, dia menggunakan kaedah tajur dengan umpan anak ikan keli.

"Setakat ini, ia adalah berat paling tertinggi pernah saya dapat dan ikutkan ada penduduk pernah dapat hingga 28 kilogram," katanya kepada Sinar Harian.

Ujar bapa kepada empat cahaya mata itu, dia menggunakan pengalaman sebagai kaki pancing sejak remaja untuk menaikkan ikan berkenaan.



Abdul Jalil (dua dari kanan) bersama Abdullah (kanan) dan dua pemenang dalam pertandingan tersebut.

Dia yang mengalu-alukan pertandingan berkenaan berkata, kehadiran ikan asing itu memberikan kesan kepada ikan sungai tempatan.

Jelasnya, ikan pemangsa itu menjejaskan kehadiran spesies tempatan kerana sifatnya yang agresif dan memakan pelbagai hidupan dalam air termasuk anak ikan dan udang.

"Program ini perlu kerap dilakukan tak semestinya menawarkan hadiah mahal kerana kaki pancing seperti kami memang menyokong penganjurannya supaya ikan asing ini tidak menjejaskan ikan tempatan.



Hasil tangkapan peserta pertandingan dipamerkan kepada pengunjung sempena Karnival Tanah Pahang di pekarangan Dewan Jubli Perak, Sultan Haji Ahmad Shah Lipis pada Sabtu.

"Baung kuning, lampam antara ikan yang sukar didapati sekarang sejak kehadiran ikan baung ekor merah," dakwanya.

Sementara itu, Pengarah Perikanan Pahang, Abdullah Jaafar berkata, seramai 50 peserta mengambil bahagian dalam pertandingan sempena Karnival Tanah Pahang anjuran Jabatan Perikanan Pahang pada Sabtu.

"Pertandingan ini dijalankan selama tempoh 24 jam dan sebanyak 120 kilogram keseluruhan ikan baung ekor merah berjaya ditangkap.



Menteri Besar Pahang, Datuk Seri Wan Rosdy Wan Ismail (tengah) diiringi Abdullah melihat hasil tangkapan ikan baung ekor merah oleh peserta pertandingan tersebut.

Jelas beliau, pertandingan itu yang mendapat sokongan kerajaan negeri dengan tujuan bersama program kesedaran untuk menghapuskan ikan tersebut yang mengganggu ekosistem perairan negara.

Ikan baung ekor merah adalah spesies berasal dari Sungai Mekong, Vietnam dan boleh dikenali dengan warna merah pada ekornya manakala dari segi bentuk, warna dan hampir sama dengan baung tempatan.